

2019

AÑA DI FAMILIA
Y DI CUIDO DI NOS
MUCHANAN

ISLA(•)NLINE

Diamars 16 April 2019

Email: prensa@arubagovernment.aw Tel: 528-4900


CU PERSEVERANCIA
PA NOS ISLA



GOBIERNO DI ARUBA



Isla Online
Noticia Di Gobierno


 MINISTER EVELYN WEVER-CROES

Prome Minister di Aruba

Mike Eman ta culpabel di debe nacional. E ta culpabel di deficit aña tras aña Y MIKE EMAN TA CULPABEL CU ARUBA NO POR HAYA 'ZACHTE LENING'

Un pregunta cu ta surgi den comunidad ta pakico Aruba no por haya un 'zachte lening' manera Corsou y Sint Maarten si ta haya. 'Zachte lening' ta un fiansa na interes reduci cu Hulanda ta nenga di duna Aruba. Dicon Hulanda no ta yuda Aruba cu e lening aki cu interes mas abou manera cu Hulanda ta haci cu Corsou y Sint Maarten?

Pa contesta esaki, Prome Minister Evelyn Wever-Croes a bisa cu e contesta ta senciyu. Y ta mesun pregunta cu e tambe a haci na Secretario di Estado Knops kende enfaticamente a duna e contesta. E motibo pa cua Aruba no por haya e 'zachte lening', señor Knops a duna di conoce ta pa motibo di e protocol cu e Gobierno anterior di Mike Eman a firma na unda cu a yega na convenio cu Hulanda cu mientras Aruba tin deficit, lo no haya 'zachte lening'.

Hulanda tin e deber segun rijkswet pa yuda Corsou y Sint Maarten tur aña cu nan tin mester di fiansa, pa bay cu nan riba mercado internacional busca e fiansa na interes hopi abou. Esaki no ta costa Hulanda niun cen. E unico tarea di Hulanda den esaki ta pa compañía nan pa nan logra un prestamo na interes abou. Ta e trato aki Aruba ta pidi tambe di Hulanda sinembargo Hulanda ta bisa cu no por.

Ariba esaki, dia cu Corsou y Sint Maarten a haya autonomia na 10/10/10, nan a haya kwijschelding di nan debe. Hulanda e despena nan di nan debe. Esaki Aruba nunca a yega di haya. Despues cu Aruba a sali for di e constelacion antiano, Aruba a sigui paga den e fondo di solidaridad di Antias pa islanan chikito. Aruba ta cana



un trayecto completamente diferente cu Sint Maarten y Corsou. Aruba a costa Hulanda hopi menos cu Sint Maarten y Corsou, pero asina mes nan ta nenga di yuda Aruba pa haya e 'zachte lening' awo bisando cu asina cu Aruba tin un surplus otro aña, por cuminsa papia di un 'zachte lening'.

"Ta di lamenta, cu awe, un biaha nos nos tin pa haya sa e motibo pa cua Hulanda ta nenga Aruba un 'zachte lening'; y e motibo pakico nos mester paga 230 miyon florin na interes. Ta pasobra Mike Eman a redobla nos debe y riba dje a combin cu Hulanda na unda cu Hulanda ta para fuerte pa no yuda Aruba haya un fiansa na interes hopi abou tanten cu tin deficit. Un contesta asina ta hopi

decepcionante, pero e ta e realidad cu Aruba mester biba cu n'e. Pero Gabinete Wever-Croes ta trahando pa soluciona e problema aki tambe manera cu nos a haci anteriormente cu tur otro problema cu Gabinete Mike Eman a laga atras pa nos. Cu hopi orguyo, otro aña cu Aruba ta den surplus, e ora si nos por haya fiansa na interes reduci.

Pero un cos ta sigur, Gabinet Mike Eman no por bin bek nunca mas na mando. Pasobra e daño cu nan a causa Aruba, e redoblamento di e debe, y e echo cu nos no por haya fiansa na interes reduci, y tur otro dolor cu nan a causa den comunidad, ta hopi obvio cu AVP hamas por bolbe den un gobernacion pa Aruba.

Prome Minister Evelyn Wever-Croes:

GOBIERNO DI ARUBA A LANSA eLEARNING PILOT PROJECT

Cu e proyecto aki, lo pone innovacion den educacion central


Diaranson, den colaboracion cu Minister di Enseñansa, Armando Lampe, Gabinete Wever-Croes a lansa un proyecto piloto innovativo den educacion primario pa stimula e 21Century Skills for di un edad hoben caba. Gobierno lo traha cu e eLearning Pilot Project den colaboracion cu e Scol Basico Cacique Macuarima na unda lo desaroya un programa di innovacion den un manera nobo y unico.

E mainta aki, Prome Minister a wordo ricibi pa klas 1 te cu klas 6 di e Scol Basico Cacique Macuarima pa muchanan masha contento y entusiasmo y na dado momento nan a dal e grito di indjan. Muchanan por a experimenta cu e tablets y 'Virtue Reality Goggles' y nan tur a keda hopi emocionada pa ta e prome scol piloto na Aruba cu ta cuminsa cu e proyecto aki.

Prome Minister Evelyn Wever-Croes a duna di conoce cu e proyecto aki a nace danki na un comision di mayor sumamente activo kendenan a haci gran parti di un sondeo pa loke e scolnan mester pa eleva e lesnan y siña e muchanan e habilidadnan nobo aki y duna e maestronan e hermentnan y recursonan cu nan tin mester pa ehecuta e cambio aki.

Prome Minister a duna di conoce cu ora ta trata di innovacion den enseñansa, e ta un prioridad pa Gabinete Wever-Croes. Den e proximo lunanan, Gobierno lo haci un inversacion di mas di 250 mil florin den smartboards den tur lokaal di les y tambe den mas di 25 computer pa e sala di computer. Tambe e inversion lo cubri 'Virtue Reality Goggles' pa duna cierto lesnan den un forma mas interactivo y lo ofrece mas les di STEM (Science, Technology, Engineering, y Mathematics) tambe. Esaki ta den e cuadro di e manejo di educacion delinea den e Plan di Educacion Nacional cu recientemente Minister Lampe a presenta. Cu e proyecto aki, lo pone innovacion den educacion central.




MINISTER OTMAR ODUBER
Minister di Desaroyo Teritorial, Infraestructura y Medio Ambiente

DNM TA DESEA UN Y TUR DUSHI TEMPORADA DI SEMANA SANTA, RESPETANDO NOS RECURSONAN NATURAL



Campamento durante temporada di Semana Santa ta den full zwaai. Gruponan di amigonan y famia ta bini hunto pa pasa dushi dianan hunto o sea ta campando banda di lama, den un area di mondi of hospedando na hotel. Directie Natuur en Milieu (DNM) kier a hasi un suplica na comunidad pa no lubida e balor di nos recursonan natural. Nan balor ta keda halto si nos respeta esakinan.

Kico ta nos recursonan natural?

Nos matanan y bestianan, nos beachnan cu su santo blanco, nos barancanan, nos piedranan, coralnan. Nos no solamente ta recorda un y tur ariba practicanan cu ta contra ley pero tambe esunan cu ainda no ta conta cu proteccion di ley pero asina mes nan tin balor pa e ser humano.

Respetando nos recursonan natural den e forma cu nos ta haye ta muestra di respeta pa asina nos por pasele over den bon condicion tambe na generacionan cu ta bini. Respet ta significa pa no causa destruccion, no dañá, y no cambia algo cu ta den nos naturalesa of medio ambiente. Esaki ta encurasha hendenan local y

bishitante pa aprecia locual ta di nos.

Henter Aruba ta keda conmovi y ta protesta ora mira oilspil den nos lama, sacamento for di lama di streanan di lama pa saca un potret, sushinan benta den nos mondan, manchanan di zeta di auto contaminando nos suelo, kapmento mata den Franse pas, kibramento di neishinan di parha, bendemento di parhanan protehi riba social media, ora cu hendenan ta hasi graffiti ariba barancanan, ora cu ta wak actonan di rock-stacking, pikimento di drift-wood, kapmento di mangelnan, coremento cu atv's irresponsabelmente, cobamento di terenonan pa haya santo pa bende, y autonan cu ta bolter huma preto contaminando nos aire y afectando nos calidad di bida.

Pero nos no ta keda para na eseynan so. Nos kier hasi un suplica na comunidad cu ta bai campa pa uza productonan sostenibel; manera elimina uzo di productonan di plastic di un solo uso, uza proteccion solar cu no ta contene oxybenzone, uza stofnan di gas pa cushina, uza coreinte (delco) na un forma minimo, huur bañonan, etc



Ta recorda un y tur cu verguningnan a wordo otorga pa KPA y na esakinan tin reglanan mara. Pero ta keda na cada un di nos cu nos comportacion pa cu nos recusionan natural. Ban respeta nos naturalesa den temporada di cuaresma. Pa raporta cualkier acto contra nos naturalesa y medio ambiente por hasi uzo di Infraruba.com of e app.

DNM HAYA UN PRESENTACION FOR DI STICHTING SCUBBLEBUBBLES PA E DI DOS CRIADERO DI CORAL

Den luna di maart, Directie Natuur en Milieu, Departamento di Naturaleza y Medio Ambiente (DNM) a haya bishita di e team di Stichting Scubblebubbles cu a duna un presentacion di nan proposicion pa un di dos criadero di coral na Aruba. Presidente di e board, Nichole Danser, conhuntamente cu Valerie van der Veldt, Isabel Bangma y Santiago Gonzalez Mora, a reuni cu Departamento di Naturaleza y Medio Ambiente pa splica con nan stichting ta trahando pa realisa e di dos criaderodi coral. Tambe nan a conta di e trabounan cu nan ehecutando pa por forma parti di un equipo di investigadornan (researchers) internacional. Di e manera ey crea un plataforma mas amplio pa expande nan conocimiento ariba e topico.

E grupo di Scubblebubbles ta consisti di 33 boluntario di cual 27 ta certifica PADI openwater y otro 6 boluntario cu ta concentra ariba otro proyectonan manera esun di Pitchtime di Cedearuba. Hopi di e boluntarionan ta studiantenan di scolnan secundario di Maria College, de Schakel College y International School of Aruba. Scubblebubbles su proposito ta pa yuda cuida y desaroya areanan cu coral tipo Staghorn Coral (Acorpora Cervicornis), den areanan caminda tin menos actividad humano pa asina e sorto di coral aki por crece y forma criadero di coralnan saludabel. Locual e grupo di boluntario di Stichting Scubblebubbles ta bay haci ta, uza pidanan chiquito di coral (colonianan), cultiva y cria nan den un area cu tin cierto condicionan pa e coral por crece bon. Asina



cu e coral cuminsa bira grandi y fuerte suficiente, lo transplanta of realoca nan pa un sitio di origen cu ta un area di 10 pa 15 meter hundo. E localidad aki lo ta uno cu e condicionnan necesario pa e sorto di coral aki. Den e area aki tampoco lo tin actividad humano pero mas importante e mester ta un area protehi y facil pa tene bista riba nan.


E team di boluntario di Scubblebubbles lo monitor y evalua e condicionnan di e criadero di coral. E team lo bay na e sitio di criadero tur siman pa haci mantencion di e coralnan. Entre otro, haci nan limpi contra alga y firecorals cu por bay crece y stroba e coral Staghorn. Tambe lo monitorea nan crecimiento y desaroyo. Un bes cu e realocacion tuma lugar e voluntarionan lo sigui monitorea e condicion y salud di e coralnan, teneniendo na cuenta e cantidad di pisca rond di e area di coral. Scubblebubbles tambe ta forma parti di Project AWARE di PADI internacional.

Departamento di Naturaleza y Medio Ambiente a keda



impreciona pa e iniciativanan di Scubblebubbles y a felicita nan cu e exito di e prome criadero y ta apoya nan esfuerzo pa e di dos criadero di coral. E iniciativanan aki tambe ta aporta na e metanan mundial pa un desaroyo

sostenibel. Ta trata aki di SDG #14 - Bida bou awa, cu ta pa conserva y uza oceano, lama y e fuentenan marino na un manera responsabel y sostenibel.



MINISTER XIOMARA RUIZ-MADURO

Minister di Finansa, Asuntonan Economico y Cultura

UN SOÑO DI FUNDADORA DI FMC, SRA. IMELDA ECKMEYER-BERMUDEZ, TA BIRA REALIDAD CU CAS DI TAN TIN



Deseo di fundadora di Fundacion Mi Cutisa (FMC), sra. Imelda Eckmeyer-Bermudez (d.f.m.), kende tabata un persona hopi conoci den bario di Noord, prome cu el a bay laga nos, tabata cu un dia su organisacion FMC por haya un luga unda por haci actividadnan cultural-educativo-social y turistico pa Aruba.

Imelda Eckmeyer tabata un costurera masha conoci na Aruba. E mes a cose varios trahe tradicional di Aruba pa FMC. Su soño tabata pa un dia FMC por haya un cas tradicional di Aruba, unda nan por bay saca potret di bishitantenan bisti den trahe tipico di Aruba. Ta hopi aña largo sra. Imelda, su famia y conocinan tabata core rond di Aruba pa mira unda tin un 'Cas di Cunucu' na Aruba cu FMC lo por sea huur of compra. Porfin e soño aki ta bira realidad dia 16 di april 2019, ora cu Stichting Monumenten Fonds Aruba (SMFA) entrega e yabi

di Cas di Tan Tin na Minister di Cultura sra. Xiomara Ruiz-Maduro, kende na su turno lo entrega e yabi na FMC.

Fundacion Mi Cutisa ta un organisacion cu ta consisti di personanan cu ta traha a base boluntario cu ta hopi conciente di nos mes cultura. Tur ta personanan cu kier duna un aporte positivo na desaroyo di cultura, na engrandece conocimiento di nos herencia cultural bou di muchanan y pueblo di Aruba en general. Un di nan metanan principal ta pa promove loke ta forma parti di nos tradicion y folklore di Aruba.

FMC actualmente ta trahando riba varios investigacion y documentacion. Entre otro tin un grupo di trabou cu ta trahando riba descripcion di e trahenan tipico di Aruba. Tambe FMC kier investiga kico tabata nos productonan tradicional di antes cu nos hendenan tabata produci na Aruba. Asina FMC ta masha interesa den e historia di e trahamento di popchi antes na Aruba. Con nos hendenan tabata traha popchi y di ki material. Tambe FMC kier bay ofrece turistanan cu ta bishita Cas di Tan Tin algun producto cu ta laga nan cera conoci cu nos custumbenan di antes.

En bes di usa un saco pa pone cos aden, FMC lo bay usa 'bonder' pa mara cos



aden. FMC lo bay haci algun investigacion pa mira ki sorto di producto mas nan por ofrece nan bishitantenan, pero muy en particular nos turistanan pa nan por experiencia un tiki di e cultura tradicional di Aruba y eventualmente hiba nan pais bek algo pa sigui recorda nan di nos dushi isla. Cu e proyecto aki FMC lo sigui traha riba tereno di cultura y educacion cultural pa medio di expone

y duna informacion di e Cas di Tan Tin y di artefactonan di antes. Y awor cu FMC tin su mesun localidad, e fundacion ta bay amplia su tarea cu e servicio social y turistico.

Dia 1 di mei 2019 FMC lo tene un Open House na Cas di Tan Tin special pa tur boluntarionan di FMC y despues lo anuncia ki dia lo habri portanan di Cas di Tan Tin pa publico en general.



Minister di Finansa,
Asuntonan Economico y Cultura

**Gobierno di Aruba pa medio di
Minister di Finansa, Asuntonan Economico y Cultura
mr. Xiomara Ruiz - Maduro**

Tin e placer di invita bo persona pa asisti
na e presentacion di e

“MANEHO ECONOMICO 2019–2022”
Un Economia Fuerte y Resiliente

Fecha: | Diaranson, 17 di april 2019
Orario: | 5:00 pm – 7:00 pm
Luga: | Surfside Marina
Trahe: | Business Suit

R.S.V.P.

Dialuna, 15 di april 2019 na
Email: junior.arends@gobierno.aw




 A portrait of Minister Glenbert Croes, a man with glasses wearing a dark suit and tie, set against a background of stylized blue and yellow geometric shapes.
 MINISTER GLENBERT CROES
Minister di Asunto Social y Labor

Minister Glenbert Croes: ARUBA TA NOS TUR



Dialuna cu a pasa tabata un dia grandi unda cu Ministerio di Asunto Social y Labor un biaha mas a organisa su proyecto Bus di Alegria.

Un iniciativa di Bureau di e Mandatario conhuntamente cu Kuko Kunukoo, Fofoti Tours y AGW Tours, cu ocho bus transportando 376 hende en total, a pasa un mainta di recorrido rond di nos isla.

Un mainta di sonrisa y hopi alegria cu a termina na Parke Jaburibari bou musica, entretenimento unda cu tur participante a haya un almuerzo ofreci pa Galloway Corporation.

Na salida di e recorrido, Minister Glenbert Croes a bay pa desea



nos hendenen special bon ora di caminda. Na yegada Minister President di Aruba a bay encontra cu nan na Parke Jaburibari pa culmina e mainta di alegria.

"Un cooperacion entre Gobierno y Comercio, un proyecto cu ta demostra cu e ser humano ta central. Cu inclusion di nos hendenan special ta crucial. Un gesto cu cual nos kier demostra cu nan ta hopi importante pa nos. Cu nan cuido ta primordial pa nos. Y ohala cu e amor aki cu nos tin pa nan, por contagia nos comunidad pa hunto nos logra lo maximo pa nan", tabata palabranan di Minister Glenbert Croes.

**APRIL IS CHILD ABUSE
PREVENTION MONTH**



PROLONGACION DI ENTREGA DI REGISTRO DI PERSONAL 2018 - 2019



E Ordenansa Laboral 2013 (Arbeidsverordening 2013, AB 2013 no. 14) ta vigente desde 1 di april 2013. A base di articulo 30, di promer inciso, di e Ordenansa Laboral 2013 un dunado di trabou ta obliga pa entrega e Registro di Personal (Personeelsregister 2018-2019) na Director di Departamento di Labor & Investigacion (DAO). Den e Decreto Nacional Registran di Ordenansa Laboral 2013 ta regla e modelo di e Registro di Personal. E Registro di Personal ta consisti di tres parti, **Modelo 1A**, e personal actual manera registra na december 2018; **Modelo 1B**, e necesidad pa personal pa 2019 y **Modelo 1C**, e necesidad di personal pa cada proyecto specifico.

Departamento di Labor ta informa pa medio di e comunicado di prensa aki cu e periodo di entrega di Registro di Personal 2018-2019 a wordu prolonga pa tur empresa na Aruba cu seis siman mas, y te cu 31 mei 2019. Despues di e fecha aki, NO lo duna mas prolongacion.

Unda y con por entrega e formulario di personal 2018-2019

DAO ta haci un peticion pa hinca e datonan den e formulario digital, segun e modelo stipula pa ley y manda nos esaki na e e-mail adres arbeidsmarktaruba@gmail.com of arbeidsmarktonderzoekaruba@gmail.com.

Incumplimento

Despues di e periodo di entrega e dunado di trabou cu no entrega e Registro di personal ta den incumplimento cu art. 30 di Ordenansa Laboral 2013.

Riba violacion di art. 30 lo por aplica un sancion administrativo di afl. 5000,- den forma di un 'Last onder dwangsom' caminda e dunado di trabou lo wordo avisa cu e ta den incumplimento y e ta haya un cierto tempo pa coregi e violacion. Si den e tempo stipula e no

haci esaki lo formalisa e 'dwangsom' caminda e lo mester paga e suma di afl. 5000,- pues ta depende di e dunado di trabou finalmente si ta sigi e procedura di un sancion administrativo si of no. Na final locual kier logra ta cu e dunado di trabou ta cumpli cu ley y mirando cu e infraccion por wordo coregi ta duna un ultimo chens pa coregi esaki prome cu e resulta den un sancion.

Pa mas informacion riba e cambio den forma di e Registro di personal 2018 - 2019 y tambe unda y con por entrega e formulario di personal 2018 - 2019,

ta wordu referi na nos website www.daoaruba.com of www.gobierno.aw of pa ricibi e formulario digital, por haci un peticion via e-mail adres aanvraagpr@gmail.com y DAO lo mail bo e formulario digital.

Si tin mas pregunta tocante e Registro di personal 2018-2019 por tuma contacto cu sra. Louissety Croes na 5237722 of via email louissety.croes@aruba.gov.aw of c'un funcionario di Bureau Arbeidsmarktonderzoek na 5237720.

Charla:
Diferente etapa
di desaroyo di
mucha




Departamento di Asunto Social

Fecha
16 april 2019
Orario
7:00 pm - 9:00 pm

Luga
Enseñansa Pa Empleo
Engelandstraat 33

Pa informacion/inscripcion, tuma
contacto cu bo trahado social/
terapista of Jesseline Kelly na telefon
528-1153 of manda un mail na
Jesseline.Kelly@dsz.gov.aw

MINISTER ARMANDO LAMPE

Minister di Enseñansa, Ciencia y Desaroyo Sostenibel



DEA A PRESENTA PEN 2030 NA STAKEHOLDERNAN

Diabierna dia 12 di april Departamento di Enseñansa Aruba tawata tin e honor pa presenta e Plan Educacion Nacional (PEN) 2030 na stakeholdernan di sector social, economico y di medio ambiente. Na final di aña 2017 Minister di Enseñansa sr. dr. A.R. Lampe a encarga Departamento di Enseñansa Aruba (DEA) cu e Plan Educacion Nacional: PEN 2030. Meta di e Nacionaal Onderwijsplan "PEN 2030" ta pa hunto cu tur stakeholder yega na un vision comun pa Educacion na Aruba.

Durante e atardi aki sra. Sheila Maduro, Hoofd Onderwijskundige Zaken di Departamento di Enseñansa Aruba a elabora tocante e proceso pa yega na e plan. E proceso aki a encera consultanan cu diferente stakeholdernan, pa asina nan por a duna nan contribucion na e vision nobo pa Educacion na Aruba.

Tambe a organisa actividadnan pa intercambia pensamentonan tocante calidad, innovacion y best practices den Enseñansa.

Como punto di salida a uza e General Education Quality Analysis Diagnosis Framework (GEQAF), di UNESCO. Tambe a uza un analisis SWOT di e Nacionaal Onderwijs Plan 2007-2017 y Enseñansa. Pa duna docentenan e oportunidad di vocifera nan opinion, a tene un encuesta digital. Na mes un manera comunidad tambe a contribui na yega na e vision di PEN 2030. Expertanalyses a wordo teni na diferente ocasion unda directivanan di scol, Inspectoria di Enseñansa hunto cu Departamento di Enseñansa a evalua e situacion actual di Educacion y e rumbo cu nos kier tuma como pais. Durante e ronda di consulta pa cabesantenan di tur scol na Aruba, na nan turno a haya e oportunidad di vocifera nan puntonan di atencion pa Educacion y e elementonan cu nan lo kier den e vision pa Educacion 2030.

Educacion ta concerni nos tur, y pesei ta asina importante pa traha hunto cu stakeholdernan pafor di Educacion



pa asina nos conhuntamente logra e metanan. E sectornan pafor di Educacion a duna nan perspectiva riba e rumbo cu nos pais mester tuma pa asina acopla cu desaroyonan nacional y internacional.

Durante e presentacion akinan Sra. Maduro a trece varios topico padilanti

e.o. desaroyo di Enseñansa mundial y na Aruba, habilidad necesario, puntonan di atencion pa enseñansa y vision di Educacion 2030.

Ademas a toca e tema di e cuadro di calidad cu ta encera meta di desaroyo, resultadonan desea, procesonan primario, fuentenan nucleo y mecanismo di sosten.

Continuacion Pagina 7

Sra. Maduro a amplia tocante e resultadonan cu a bin di tur e actividadnan. Kico ta e puntonan di bista cu a bin dilanti di parti di e stakeholdernan interno y externo y e buraco cu tin y con pa yena esaki. Tambe a papia tocante e mision, balornan, vision nobo, metanan strategico, puntonan clave di cada meta strategico y con lo bay di plan pa accion. Tambe a elabora tocante e situacion di Enseñansa actual y e situacion desea y con pa yega na esaki

Ministerio di Enseñansa y Departamento di Enseñansa Aruba kier a haci uzo di e oportunidad aki pa gradici tur stakeholder cu a contribui pa realisa PEN 2030.

Pa mas informacion por acudi na nos website [ea.aw] y busca PEN 2030. Tambe por sigui desaroyonan relaciona cu Enseñansa na Aruba a traves di facebook, twitter y Instagram @educationaruba.



2019 | AÑA DI FAMIA Y CUIDO DI MUCHANAN.

*Prioridad pa
Gobierno di Aruba
ta pa haci central
e cuido y desaroyo di
nos muchanan na
scol!*



PREMIER EVELYN WEVER-CROES “E SONRISA RIBA NAN CARA TA DUNA NOS E FORSA PA SIGI TRAHA RIBA INCLUSION”



UN BUNITA INICIATIVA DI MINISTER GLENBERT CROES Y SU MINISTERIO



ARUBA A WORDO PONI RIBA E LISTA DI PAISNAN LATINO AMERICANO Y CARIBENSE PA HAYA SCHOLARSHIP DEN E FORMA DI “IN-STATE TUITION FEE”

SCHOLARSHIP DEN E FORMA DI “IN-STATE TUITION FEE NA 12 UNIVERSIDAD CU TA CAY BOU DI FLORIDA STATE UNIVERSITIES	
	FLORIDA A & M UNIVERSITY
	FLORIDA GULF COAST UNIVERSITY
	FLORIDA POLYTECHNIC UNIVERSITY
	NEW COLLEGE OF FLORIDA
	UNIVERSITY OF FLORIDA
	UNIVERSITY OF SOUTH FLORIDA
	FLORIDA ATLANTIC UNIVERSITY
	FLORIDA INTERNATIONAL UNIVERSITY
	FLORIDA STATE UNIVERSITY
	UNIVERSITY OF CENTRAL FLORIDA
	UNIVERSITY OF NORTH FLORIDA
	UNIVERSITY OF WEST FLORIDA

Durante e bishita di trabou di e Minister Plenipotenciario di Aruba na Washington DC, Joselin Croes, na Tallahassee, hunto cu su coleganan di embahadanan, a reuni cu Marshal Criser III, Chancellor, Vikki Shirley, General Counsel y Crysty England, International Affairs, tur miembro di State University System of Florida y nan a comprati cu nos e grato noticia cu Aruba a wordo inclui riba e lista di paisnan Latino Americano y Caribense cu por bin na remarca pa un scholarship den e forma di “in-state tuition fee”.

Conforme Section 7(d), Art. IX, Fla. Const.: Sections 1009.21 and 1011.43, Florida; History, studiantenan di Aruba cu kier bay studia na un di e 12 Universidadnan cu ta cay bou di Florida State Universities, por wordo otorga un scholarship dependiendo di nan cijfers, actividadnan extra curricular, excelencia den deporte y of otro merito.

Bo mester ta un residente di Aruba pa bo por bin na remarca pa e scholarship aki. E scholarship otorga por wordo kita si e estudiante no ta cumpli cu e standard academico cu e Universidad ta exige. E estudiante Arubiano cu logra haya e scholarship lo wordo considera igual na un residente di Florida pa cual motibo e lo bin na remarca pa e prijs cu un residente lo paga pa su estudio na Florida.

E prijs aki mayoria biaha ta 50% te cu 70% mas barata cu e prijs cu un estudiante internacional ta paga ora nan bay e universidadnan aki. E prijs pa residente pa mayoria di e scolnan aki ta core entre USD 4.000,00 – USD 6.500,00 pa aña. Banda di esaki e gastonan pa vivienda (room & board) ta core entre USD 9.500,00 – USD 12.000,00 pa aña. Gastonan di buki, trasportacion y seguro ta core entre USD 4.500,00 – USD 6.500,00 pa aña. Na un averahe total di mas o menos USD 21.000,00 pa aña.

Conforme e reglanan di prestamo pa studiantenan di Aruba, cada estudiante lo por bin na remarca na un maximo di AWG 140.000,00 pa nan estudio completo, parti den parti cada aña. E prijsnan aki ta haci'e posibel pa mas estudiante por bin studia na Merca, sin cu e tin extra gasto pa e mayornan.

Segun estadistica di aña 2016, di tur e studiantenan cu ta bay studia na Hulanda solamente 20% ta gradua nan Universidad y di e grupo ey solamente 5% ta bolbe Aruba. Motibo pa esaki ta cu door cu nan tin paspoort Hulandes ta mas facil pa nan haya trabou na Europa y eynan nan ta wordo paga den euro's cual ta haci'e mas atractivo. Motibo pa cual mayoria no ta caba ta cu e sistema di educacion ta mas academico y menos practico den comparacion cu e sistema mericano. Di e total di mas o menos 80 estudiante cu ta bin studia na Merca tur aña, 95% ta gradua y mayoria di nan ta bolbe bek Aruba. Florida semper tabata e destinacion favorito pa studiantenan di Aruba paso e ta cerca e tin mes un tempo cu Aruba y e ta un estado economico pa biba.

Na tur estudiante cu ta interesa den mas informacion nan por tuma contact cu Directie Onderwijs na Aruba of cu Joselin Croes na Embahada di Reino Hulandes na Washington DC na 2022742610 of joselin.croes@minbuza.nl.

SCHOLARSHIP UNIVERSITIES FLORIDA



GOBIERNO DI ARUBA

DEN E FORMA DI "IN-STATE TUITION FEE"

Mester ta un residente di Aruba.

Lo wordo considera igual na un residente di Florida.

Por scoge entre 12 Universidad cu ta cay bou di
Florida State Universities.

Lo bin na remarca pa e prijs cu un residente lo paga
pa su estudio na Florida.

E prijs aki mayoría biaha ta 50% te cu 70% mas
barata cu e prijs cu un estudiante internacional.

Lo paga un averahe total di mas o menos
USD 21.000,00 pa aña.

cada estudiante lo por bin na remarca na un maximo
di AWG 140.000,00 pa nan estudio completo.

Ta limita extra gasto pa e mayornan. Florida ta mas cerca di cas
y ta un estado mas economico pa biba.

**E scholarship otorga por wordo kita si e estudiante no ta cumpli
cu e standard academico cu e Universidad ta exige.**

Pa Informacion:

WASHINGTON DC

Embahada di Reino Hulandes
2022742610 of joselin.croes@minbuza.nl

ARUBA

Directie onderwijs



GOBIERNO DI ARUBA

un
Feliz Dia

ISLAONLINE
PA INFORMACION
CORECTO Y BERDAD

Gabinete Wever-Croes